

DE OLEIS
TENTAMEN INAUGURALE
QUOD
GRATIOSI MEDICORUM ORD. CONSENSU
GRADUM DOCTORALEM
IN
MEDICINA
PAUCIS DIEBUS POST PERACTAM DISPUTATIONEM IMPETRANDUM
SIBI PARATURUS

D. 17. Jul. 1781.

PUBLICO ERUDITORUM EXAMINI
SUBMITTET

JACOBUS LORIMER
SCOTO-BRITANNUS

SOCIETATUM CHIRURGICO-MEDICÆ ET PHYSICO-CHIRURGICÆ EDIN. SOC.
HORIS ET LOCO CONSUEVIS.




B A S I L E Æ,
Typis JOHANNIS SCHWEIGHAUSERI.

V I R O
P E R I L L U S T R I
A L E X A N D R O D I C K
D E P R E S T O N F I E L D ,
E Q U I T I A U R A T O ,
C O L L E G I I R E G I I M E D I C I E D I N B U R G E N S I S S O C I O ,
E T O L I M P R Æ S I D I ,
O B E R U D I T I O N E M S P E C T A T I S S I M O ,
O B V I T A M , M O R E S , B E N E V O L E N T I A M , S U M M E V E N E R A N D O ,
N E C N O N

V I R O
P R Æ N O B I L I , A M I C I S S I M O
S A M U E L I R O D . J E A N N E R E T
I L L U S T R I U M R E R . P U B L . B E R N . E T F R I B U R G .
I N U R B E E T C O M I T A T U G R A N D S O N P R O P R Æ T O R I
H O C T E N T A M E N
T A N Q U A M P A R V U M T E S T I M O N I U M S U M M Æ V E N E R A T I O N I S
D . D . S . Q . P .

A U C T O R .

Hunterian Add 64



E8705/1



C A P. I.

De Olei natura in genere.



Substantiarum, quæ olea, nominantur, fere nemo est qui prorsus ignorat proprietates: Omne oleum per se, & sine alienæ materiæ admistione, unctuosum est, volatile, inflammabile, & flamma correptum fumum & fuliginem præbet, cum aqua vel fluidis aquosis misceri ægre aut omnino non potest.

Commune verum utut sit hoc genus materiæ & quotidianæ observationi objectum, in oleorum natura tamen & indole multa adhuc inexplicata restant; & quidem verisimile est, post longum tempus hanc rem materiam ad indagaciones chymicas inexhaustam suggesturam.

Ad nostros sensus, quamvis homogenea satis & simplicia videantur, e variis mutationibus quibus subjiciuntur, plane constat, olea non parum composita esse. Na-

A

turali

turali & spontaneo interdum processu, ut putrefactione, in partes varias componentes resolvuntur; igne & destillatione analysin eorum chymici assecuti sunt. Et ab hoc genere analysis, licet (quandoquidem calor & ignis ad multa mutanda valent) non impetrentur partes componentes in eodem statu, iisdem inter se colligationibus, ac in oleo extiterant, hoc nihilominus bene comprobatur, oleorum valde compositam naturam esse, eaque in varia differentiaque principia resolvi posse.

Pancæ sunt materiæ species, quæ latius per omnem fere naturam, quam olea, repanduntur. — In omni planta invenitur oleum, in omni animali; nec quidem minerali regno absolute deest: ubicunque corporibus, quorum pars est, proprias dat qualitates propriamque indolem.

Apud auctores distinguuntur communiter olea & plantarum & animalium, secundum duos status, in quibus in eorum corporum massa inveniuntur: primus est, ubi oleum ab aliis partibus, alia materia, sejunctum sepositumque, in cellulis & receptaculis sibi propriis reconditur; alter, ubi reliquis partibus, reliquæ corporum materiæ, immiscetur & confunditur; tali modo ut, nisi illius corporis decompositione, sejungi non possit. — Prioris exempla sunt adeps, medullaque animalium, & olea, quæ e diversis fructibus & juglandibus vi solum mechanica exprimi solent; alterius illud oleum, animali proprium naturæ, quod e partibus non adiposis, e cornibus, unguibus, materia glutinosa, distillatio elicit; nec non varia olea, quæ per plantarum corpora diffusa, hæc, nisi igne decomposita non relinquere queunt.

Alia lege distinguuntur olea in genera etiam duo; eorum scilicet, quæ ob crassitudinem & unctuositatem pingua, & eorum quæ ob tenuitatem levitatemque æthereæ, nominata sunt. Inter hæc numerantur omnia illa
olea

olea vegetabilia, quæ, odores suis plantis peculiare retinentia, essentialia vulgo nominantur, tum & omne oleum, cui tanta levitas, ut calore aquæ bullientis facile & sine decompositione distilletur. Alterius verum generis est adeps omnis animalium, olea pleraque expressa, omnia demum quæ in calore aquæ bullientis fixa restant.

Oleum empyreumaticum dictum nullum proprium est genus: omne quodcumque oleum ignis nimia actione depravatum decompositumque empyreumaticum fit.

Olea autem, quæ in regno minerali inveniuntur, cum bituminibus licet ut genus distinctum considerare.

Hæ sunt præcipuæ distinctiones oleorum, quas observatio adhuc probavit, & satis sunt forte vel ad usum vel pro scientia rei imperfecta.



C A P. II.

De Ignis vel Caloris in Olea effectibus.

Fluiditas omnis a calore, ab igne saltem presente, efficitur videtur, & calore forsan plus minusve intenso materia cujuscunque generis fluida devenit. Hic tamen magna est naturæ corporum diversitas, & inter olea solum magis miranda est differentia, quam hæc aliis tam inter sese similia videntur.

Cera, & adeps ille sperma ceti dictus, non quidem liquefieri incipiunt, nisi in calore qui superior est ei, quo gaudet humanum corpus. Adeps communis, butyrum, multa que similia, nunquam fere in solitis atmospheræ

temperaturis, nisi sub solida concretaque forma, videntur. Juglandis, Olivæ, & multa alia olea, frigori moderatissimo exposita, fluiditatem suam amittunt & congelantur; dum alia e contra, generis ejusdem, congelari & consolidari vix ullo frigore possint. Lini, Cannabis, nucis Avellanæ, multa olea expressa unctuosâ, omnia fere essentialia & ætherea nullum hucusque inventum frigus congelare sufficit.

Certas & veras causas hujus diversitatis indicare perdifficile mihi videtur; probabilibus & conjecturis forsitan nos contineri necesse est.

Notiones Philosophorum quorundam de fluiditate tanquam a certa magnitudine figuraque particularum effecta, nulla observatione firmantur, & plerisque hodie repudiatae sunt. Res est longe certior, quæ jam supra notata, calorem plurimum contribuere ad fluiditatem. Quid verum est calor, nisi sensatio in nobis præsentis igne excitata? Ignis autem, an nunquam præsens est, ubi nullo calore sensibili manifestus? Quod fluida immediate respicit, nihil certius est, quam ignis quantitatem iis inesse revera, & fluiditati necessariam cum etiam nullo calore percipi possit. — Aqua enim calidior quam antea sit eo temporis momento quo gelascit, quo in solidam transit formam; metalla aliaque corpora, quæ fusa sunt, idem in congelando phænomenon exhibent; eaque caloris augmentatio nostra sensatione non minus quam thermoscopo manifesta est. E contra iisdem corporibus ex soliditatis statu in statum fluiditatis transeuntibus, ipsorum calor subito minuitur, & ex parte disparet. — Multas alias observationes & experimenta hic liceret memorare; at hæc sufficiunt, quoniam clare & plene demonstrant, quod ignis (causa scilicet caloris) præsens sit sub certis legibus, ubi nullo tamen calore sensibili præsentia ejus indicatur. Ignis autem ita latentis, ita sensui imperceptibilis, an quantitas eadem

eadem similisve est in omni corporum genere? anne quædam corpora majorem quantitatem quam alia admittere possunt, itaque causam fluiditatis majorem in se, in sua compositione & volumine, habent? — Ob phænomena diversa, multasque observationes, hæc notio mihi haud inverisimilis visa est. — Corporum enim quorumlibet, in quibus diversus est calor sensibilis, quantitates ignis absoluti pariter diversas esse, nemo dubitabit; si verum diversa sit quantitas ignis in corporibus, ubi manifestatur calore sensibili, quid prohibet, ne diversa sit quantitas ignis etiam in corporibus ubi ut supra monstravimus, ignis sine calore correspondente inest. — Existimatur a multis (& ad opinionem firmandam argumenta sane non desunt), corpora multas qualitates, odorem, exempli gratia, saporem, colorem, ab igne qui intrat in eorum compositionem, maxime habere: Quum autem, corporibus inter se satis similibus, intensitas harum qualitatum multum variet, nonne probabile est, ignis quantitatem simili ratione variare? Denique si experimentis ~~confectum~~ *constatum* sit, diversa corpora, licet iisdem circumstantiis exponantur, non pares manifestare facultates ad calorem sensibilem edendum, nonne prorsus evidens & certum est, quod causa caloris, sive ignis præsentis quantitas, in his corporibus etiam dispar sit. — Hic igitur una causa, & certe non parva, videtur inveniri, quamobrem fluiditate vel magis fusilitate, corpora tantum differant. Quo plus enim ignis absoluti in compositionem olei, metalli, aut alius cujusvis materiæ iniit, tanto magis ea materia ad fluiditatem proclivis erit, & minori calore externo ad ejus fusionem opus erit. Hæc notio, licet non confirmetur, illustrabitur saltem ab analogia: liquiditatis & fluiditatis, liquefactionis & fusionis phænomena multa similia, multa communia, inter sese habent: si igne funduntur corpora, menstruis solvuntur, & liquefiunt; in casu utroque particulæ disjunguntur, & adhesionem mutuam amittunt. — In solutionibus hoc fit menstrui particulis, quæ sese inter eas soluti corporis inter-

interponunt; in fusione idem, ut verisimile est, faciunt particulæ ignis, qui quidem omnium corporum est quasi menstruum universale. — Aqua igitur spectetur, e men- struis communissimum, & materiæ salinæ, quibus nihil frequentius dissolvimus; Varietates, quæ in eis deprehen- duntur, fere sunt similes illis quas ab igne factæ solutiones nobis offerunt. — Pluræ aqua quibusdam salibus, pau- ciore aliis, ut solvantur, opus est; & quibusdam etiam, ut acidis mineralibus, tanta est affinitas cum aqua, ut ab ea separari nequeant, & nisi sub forma solutionis, vix unquam conspiciantur. — Salinæ omnes substantiæ aquam in suam massam accipiunt, hanc autem sub diversis legi- bus & diversa conditione: in uno casu, aqua pars est con- stituens & necessaria ipsius salis; in alio facillime, & sine salis quadam decompositione, separanda, ad nihil, nisi formam, vel crystallisationem forte inserviens. — Modo fere simili omne corpus in suam massam ignem accipere videtur, at vero sub varietatibus similibus; & ut aqua, sub quadam conditione præsens, liquiditatem facilem ef- ficat, sic fluiditatem ignis; quæ autem, vel quales illæ conditiones, & sub quibus legibus intrent in compositio- nem corporum vel ignis vel aqua? humanæ intelligentiæ prorsus latitat.

Sed, ut redeamus ad propositum, ab his quæ supra tradita sunt, hoc saltem probabile redditur, ut tum alia corpora, tum olea, inter sese differant quoad ignis quan- titatem, quam singula in suam compositionem accipiunt; & hunc adeo licebit pro una causâ diversæ fluiditatis æsti- mare. — Sed hæc causâ non sola est; quum enim salium complurium proprietas sit, ut oleo, cui adjuncti fuerint, soliditatem concretamque formam afferant, & revera haud rara aut parum communia talia composita conspiciamus. — Conjunctioni hujusmodi, scilicet acidi cum oleo, tribuen- da est soliditas ea, quæ in cera, in butyro, in adipe, in resinis, multisque similibus materiis conspicua est. Tali- bus

bus quidem sæpe accidit, ut principium id salinum tam accurate cum reliquis commisceatur & jungatur, ut neque gustui, neque sensibus nostris aliis præsentia ejus indicetur; calore verum evolutum facile detegitur, tumque non modo sensibile devenit; sed haud raro sal, quo magis extricatus est, eo magis corpus ad soliditatem inclinatur; sic olivarum sive lini oleum, cujus acidum coquendo evolutum, minore quam antea frigore congelatur.

Præterea autem in essentiali omni oleo, in animali strictius dicto, & quibusdam forte aliis, inest subtile volatile quoddam principium, quod certe ad illa fluida reddenda, non parva efficacia gaudet; dum hoc restat, frigore vix quolibet congelantur; hoc dissipato, oleum concretam formam facile sub temperatura communi induit.

Hoc in loco haud indignum notatu videtur, quod accidit his oleis, quæ frigori exposita fluiditatem amittunt; & quo ab aqua gelascente præcipue differunt. In actu congelandi aqua distenditur semper, & suum volumen auget; olei gelascentis e contra volumen contrahitur, & fieri videtur species crystallisationis, particularum saltem nova ordinatio, ut in oleo olivarum congelato cuique observare contigit. Ad hoc licet adjicere, quod nullum oleum gelari incipiat nisi tempore certo post temperatura gelante, quam gavisum est. Olivarum oleum frigoris multo minore gradu, quam aqua, gelatur, frigoris gelantis verum multo longiore adplicatione ei quam aquæ opus est.

Caloris sive ignis activi præsentia non modo fluiditatem in corporibus efficit, sed pro quantitate, qua præfens est, eam fluiditatem auget, attractionem & contactum particularum inter sese imminuens, corpus jamjam fluidum rarefaciens, vaporans, dilatans. — Hi caloris effectus in fluido quocunque conspicui, in oleoso genere sæpe insignes sunt: quot videntur gradus fluiditatis, ex. gr. in ce-

B
ra,

ra, sevo, multisque hujusmodi, a temporis momento quando solum mollescunt, ad id quo plenè ebulliunt? Hos autem non inutiliter observant candelarum aliorumque ejusmodi opifices, quorum diversis propositis & operationibus diversa opus est materiæ liquiditate. — Quam omnia fluida calorem continuo magis accipere, usque ad ebulliendum, pergant, in plerisque oleis hoc quam longissime procedit: sic lini oleum, quamvis fluidum fere semper & sub temperatura moderatissima, non tamen ante ebullit quam calorem istum intensum habeat, quem designat gradus DC. Thermoscopii Farenheit: Nec Terebinthinæ oleum essentialiale, naturæ quamvis satis volatili, ebullit minore calore quam ad gradus ejusdem DLX. — Neque tamen minore calore non incipit horum vaporatio; ex terebinthinæ oleo quidem tam magna est, ut, nisi vel magna esset quantitas, vel superficies, ex qua facta est vaporatio, contractior, tota quantitas longe antequam calorem bullientem attingat, in vapores dissipata fuisset: sed apparatu recte instituto, nullaque compressione, nisi aeris, adhibita, tales sunt illæ intensitates caloris, ignis sive quantitatem, quas hæc fluida accipere solent. — Nemo ignorat, quod plumbum, stannum, & quædam alia metalla, calore minus intenso fundantur, & dehinc quidem his metallis accidit, ut si in oleum bulliens forte injecta sint, non modo fundantur, sed etiam in calces reducantur. — Oleo lini, non minus ob fluiditatem constantem, quam ob facultatem ad suscipiendum calorem, sunt qui in thermoscoporum constructione utuntur; & hujusmodi est ille Newtonii thermoscopus, cujus descriptio & scalæ in Transactionibus philosophicis *Londini* inveniuntur. — Hujus liquoris satis regulares sunt distensiones, &, ratione caloris adhibiti, pauci sunt liquores, qui majores patiuntur, quoniam quidem per experimenta constat, eas esse cum illis vini spiritus comparatas, in ratione ut $\frac{1}{12}$ ad $\frac{5}{1002}$ vel pene ut 5 ad 3.

Visa

Visa magna facultate, quæ oleis inest ad calorem accipiendum, dum nullo, nisi consueto aeris pondere comprimuntur, facile est comprehensu, quomodo, aucta compressione, augeri etiam mirabili modo possit calor: & quoniam bitumina diversasque materias oleosas sæpe altissime sub terris invenimus, eaque nonnunquam ignis materiæe flagrantis in vicinio; non prorsus incredibilis neque ludicra videtur ea opinio, aquam forte, in illa sic calefacta incidentem, posse interdum terræ motibus explosionibusque horrendis causam præbere (a).

De oleo Terebinthinæ mox supra notatum est, id longe ante quam ebulliat vaporari jam cœpisse; at quod de terebinthinæ, id non minus de omnibus oleis essentialibus & athereis verum est; omnia enim, quamvis magnum calorem accipere, moderato tamen vaporari possunt; & illa etiam olea pingua vel unctuosæ dicta, quæ natura sunt minus volatili, vaporationem plus minusve, calore longe inferiore bullienti, subeunt. — Nam, ut nihil dicatur de vaporatione illa spontanea, quæ plerisque fluidis, aeri aperto expositi, accidit, & gelanti quidem sub temperatura, (quam vero magis aeris actioni, ut continuitatem particularum resolventi, quam alicui propriæ rarefactioni, tribuere oportet) ipse inveni, in temperatura mei cubiculi assueta, olei olivarum unciam spatio septem horarum e suo pondere grana sexdecim, lini autem tredecim vaporatione perdidisse. — Aucto calore augetur vaporatio. Notandum vero est, quod quotiescunque calor illam bullientis aquæ excesserit, depravatio in olei naturam inducatur; eoque empyreumatico factæ & quasi in partes decomposito vaporatio non æqualis fiat, at, manentibus partibus crassioribus & densioribus, leviores solum & rariores vapore eleventur: quum igitur, ut olea omnia pingua facile & celeriter vaporentur, magno calore opus est, ergo quidem sine decompositione hæc fere nunquam distillantur. — His oleis tamen, quum possibile sit, ut

B 2 notavi-

(a) Vid. BOERHAAV. Chem. Tom. I.

notavimus, calore moderato lente vaporari, operæ præ-
tium videtur experimentum quamvis tædiosum, ut hæc
calore non aquæ bullientis superiore distillarentur.

Quas ob causas olea, ut & alia fluida quædam, ma-
gis volatilia sint, alia minus? & unde tanta in hac re
diversitas? quæstio est, cui responsum vix adhuc videtur
inventum. — In gravitate specifica ratio non querenda
est, nam aqua oleis in genere ponderosior, est etiam ma-
gis volatilis; & ferrum, quod argento vivo levius, non
in eo calore modo funditur, quo alterum, jam vapora-
tione dissipatur. — Et vaporatio, tametsi videretur quasi
nil aliud esse, nisi fluiditatis augmentum, ab iisdem cau-
sis ac fluiditas ipsa progrediens, igiturque iisdem legibus
subiecta, considerata tamen re, hæc notio prorsus ever-
titur; nam argentum vivum sub omni fere aeris tempe-
ratura suam fluiditatem conservat; ut vaporetur verum,
magno calore opus est; & inter olea reperiuntur multa,
quæ, minimo calore fluida, non nisi maximo in vapores
elevantur. — Alio modo quidam hanc diversitatem expli-
care conati sunt, quod scilicet diversorum fluidorum par-
ticulæ integrantes diversa vi inter sese attrahantur, eæque,
inter quas minima attractio est, caloris actione facilius
separentur, distrahantur; hæc itaque fluida maxime vola-
tilia esse, quibus inter particulas minima est attractio; at
ipsi fluiditati corporis sane cujuscunque, quid si non par-
ticularum attractio mutua & cohesio obstitit? admittitur igitur
eorum opinione omnino insequi debet, ut, quæ faci-
lius minoreque calore fluidantur, eadem etiam facilius
vaporentur; at res aliter sese habet; & de omni hac
quæstione multa hucusque ignorata, & occulta manent.

Olea in vaporem ubi sunt rarefacta, possunt itidem
eo in statu, & urgente calore, latiore expansionem vo-
luminisque augmentum subire; sed nemo adhuc, quem
sciam, experimenta instituit vasis clausis, neque Papini
digestore,

digestore, ut oleorum vaporum vires distendentes determinaret. — In aperto aere verum distensio hujus vaporis certo calore necessario finitur; hoc enim accepto, totus vapor flamma corripitur, & quidem sine alicujus igniti corporis contactu; sic olei olivarum, quamprimum plene ebullit, superficies tantum calorem vaporum superincumbenti communicat, quantum ad inflammandum satis est.

Ob dispositionem majorem minoremve, quæ omnibus oleis inest, calore vaporari, omnia, & vario consilio, distillatione sæpe tractantur: interdum enim distillatione utimur, ad olea separanda a substantiis in quibus continentur, alia interdum ad purificanda, nonnunquam demum ob analysin. — Olea, quæ in massis aliorum corporum quasi solum inhærent, & nullo modo cum materia aliena inierunt in compositionem, parvo opus est labore ut separentur: si jam fluida sint, vi modo & compressione mechanica opus est; si vero non fluida, insuper necessarium est, ut eum calorem adhibeamus, quo illa possunt fluida reddi. — Sed quum olea cum alienis corporibus non mere agregentur, at conjungantur & misceantur, tum vero ad separandum varia ars; præcipue distillatio, necessaria devenit. — In hoc statu inveniuntur, & his modis separentur primò omne id oleum, quod animale stricte dictum, deinde maxima pars illorum, quæ plantarum essentialia. — ~~Præ~~ *Priori* quod respicit, hic licet observare, quod, si in aqua coquatur caro, sanguis, ossa, cartilagines, cornua, denique pars fere quæcunque fluida vel solida e corporibus animalium, atque deinde per chartam colatum vaporetur hoc jus, id quod restat, semper sit quædam materia gelatinosa, ex qua quidem pars maxima cujusvis substantiæ animalis constare videtur: ab hoc autem glutine & ab hoc solo oleum proprie dictum animale distillatione postea separatur. — In hac distillatione opus est calore, qui eam aquæ bullientis excedat, quo adhibito distillatur oleum initio tenue, mox vero

crassum deveniens, & odorem foetidum empyreumaticum spirans, cum alkali volatili evidentur commistum.

Plantarum olea essentialia non omnia quidem in statu sunt compositionis; sunt enim ex iis, ut in corticibus aurantiorum limonumque, quæ, in cellulis sibi propriis condita, possumus vi mechanica exprimere. Quum vero omnia hujusmodi olea facile distillantur, & calore ei bullientis aquæ inferiore, & quum hoc sine decompositione vel depravatione fiat, communius est & commodius, omnia fere indifferenter distillatione extrahere. — Operatio est simplicissimis; Substantia oleum continens, fracta seu divisa quantum licet, mittenda est in cucurbita cum aquæ f. q. ut vasis fundus ab ignis actione muniatur; deinceps calor adhibendus est, quantus ad bulliendum sufficit. — Distillabitur oleum aqua quidem commistum, & quasi solutum, at sese paulatim sejungens, & vel superficiem vel fundum ratione gravitatis specificæ (quæ aliis alia est) petens. — Ad eadem genera olei (animale scilicet & essentialia) quæ ita distillatione obtinemus, secunda sæpe distillatio purificandi purgandive causa adhibetur. — Oleo enim ex animali glutine quod extractum est, dum initio, ut supra notavimus, crassius sit & impurius, ut purificetur, non una quidem, sed pluribus distillationibus repetitis, opus est. — In singula verum distillatione illa pars sola seponi debet, quæ levior & quæ prima ascendit, quamobrem ex olei impuri magna quantitate, purioris modo parva obtinetur: Ad hoc oleum præterea bene præparandum, oportet gluten purum fuisse, & ex omni adipis mistura quam maxime liberum; hujusmodi optimum est, quod e cornuum coctione obtinemus. — Hoc oleum autem, ubi recte purificatum est, tenuissimum, subtilissimum, coloris fere expers, odore penetranti grato gaudens, multum in medicina jactatur.

Olea

Olea essentialia in plantis sæpe Resinorum & Balsamorum sub formis invenimus, quæ quidem materiæ nihil aliud esse videntur, quam hujusmodi olea, quæ acido superabundante & partibus dissipatis tenuioribus concreta devenerunt; iisdem etenim oleis accidit fere quotidie, quod paulo longius conservata, præcipue si aeri exposita, crassescant & gradatim, vaporacione procedente, in formam balsamorum assimilentur, odore & aliis qualitatibus si non amissis, saltem imminutis. — Sed resinis, balsamis, nec non ipsis oleis, quum ita crassescerentur, omnibus pariter distillatio adhibetur, & eodem consilio, scilicet ut pars olei subtilior iterum secernatur; hæc operatio, quum is calor prorsus conveniat, optime & communiter balneo mariæ perficitur, & apud chemicos oleorum essentialium rectificatio appellatur. — Post olei essentialis rectificationem relinquitur in cucurbita materia quædam resinosa, inodora, quæ sine magno calore vaporacionem non ulterius pati potest; sed hoc adhibito oleum iterum obtinetur; at oleum est sine essentialium proprietatibus, pinguium ad instar, quod verum ignis ob violentiam prorsus empyreumaticum est.

Ad oleorum analysin nonnunquam distillationem diximus adhiberi; sed quum omnis analysi intentio debeat esse corpora in illa principia resolvere, e quibus immediate constant, si forte aliquo analysi modo acciderit, corpus non quidem in illa reduci, sed in elementa primaria, in aerem, in aquam, & similia, tum quidem a tali analysi modo nihil fere vel de natura vel de constitutione corporis docetur, & labor est pene inutilis, quoniam jam antea satis scimus, in hæc elementa primaria omne corpus probabiliter posse resolveri. — In oleis verum, ut in multis aliis substantiis, sic res sese habet, ut illo eodem calore, quo ad principia secundaria separanda opus est, separemus etiam & dividamus in partes ea principia, ita ut vel in elementa primaria reducantur, vel inter ea nova
formen-

formentur composita; insequitur, quod hæc omnis oleorum analysis valde defectuosa & imperfecta reperiatur. — In destillatione diversarum specierum Oleorum nihilominus phænomena accidunt, quæ observatu haud indigna sunt. — Eorum considerata distillatione, omnia olea possunt in duas classes distingui: horum scilicet, quæ satis volatilia sunt, ut calore, qui eum aquæ bullientis non excedit, facile distillantur, & eorum, ad quorum distillationem is calor aut pene aut prorsus insufficiens est.

Oleum crassius, non volatile si distillationi subjiciamus calore conveniente, stillatur primum in vas recipiens aquosi parum liquoris, acido imbuti; deinde insequitur oleum initio levius & volatilius, at progrediente distillatione crassius & densius difficilisque vaporandum, colore rubro magis magisque obscuro, odore gustuque acri ingrato. Per omnem autem distillationem aer, quiddam saltem elasticum aeris ad instar, sæpe extricatur; peracta distillatione in retorta relinquitur carbo niger & fixus, qui verum, in aere aperto combustus, terram albam relinquit ex qua postea, lavatione cum aqua, parvam quantitatem alkali fixi possumus extrahere. — Si oleum, quod ita distillatum est, repetitis subjiciatur distillationibus, repetuntur eadem semper productiones eademque phænomena. — In quaque destillatione olei pars decomponitur; quantitas continuo minuitur; & videtur quidem totum sic posse in aerem, in acidum, in aquam & carbonem resolveri; at non insequitur hæc esse immediata sive secundaria olei principia; illa enim videntur, ut ipsum oleum, distillatione decomponi; ex his distillationis productis nemo oleum recomponere potuit. — Si olei illam partem tenuiorem & leviolem, quæ elicitur prima, ut diximus, seponeremus, atque hæc sola de novo distillaretur, oleum tenuius etiam obtinebitur, &, reiteratis distillationibus hoc modo procedentes, habebimus denique oleum quam maxime volatile, tenue, leve & prorsus ac aqua pellucidum,

dum.—Hunc processum clarissimus BOERHAAVE usque ad quatuordecimam distillationem reiteratus est; & hoc modo ex oleo pingui & crassiore liquorem obtinuit, quam oleum essentiale quodcunque non minus tenuem, levem, volatilem, odore penetranti & grato, in vini spiritu solubilem.—Tales autem rectificationes melius fiunt, monente celeberrimo MACQUER, si oleum, ante quam distilletur, cum calcis in aere extinctæ pondere duplici immistum fuerit. Eodem modo, iisdemque prorsus regulis, oleum animale communiter purificatur; at hujus quod respicit analysin, observandum est, quod, ut in omnibus aliis oleis acidi plus minusve continetur, & distillatione plane evolvitur, & fercernitur, ex hoc e contra alkali volatilis magna quantitas educatur, præterque nihil quidem salinum. — Si verum vel hoc oleum, vel oleum quodvis essentiale, distillatione decomponere volumus, calorem oportet adhibere illi aquæ bullientis superiorem, quum, ut vidimus, tanta sit ejusmodi oleorum volatilitas, ut calore moderato sine decompositione fere ulla distillentur. — Olea essentialia autem, ubi ita decomposita sunt, easdem fere, ut olea pingua, productiones edunt, nisi quod pro olei quantitate plus obtineatur acidi, carbonis minus relinquatur. — Inflammabilitas est totius oleosi generis proprietas, & forte nullum flammæ pabulum tam frequens, tam aptum, per omnem naturam existit: oportet autem inflammationem ab ignitione distinguere; & differentia fere illi similis videtur, quæ inter fluiditatem & vaporationem extat, vel, aliter loquendo, flamma est vapor ignitus. — Etenim multa sunt metalla, diversaque alia corpora, quæ ad ignitionem satis prona ignem bene sustentant, rubescunt, comburuntur, at sine flamma; olea e contra nunquam ignitionem, nisi antea in vapores elevata, suscipiunt; his itaque inflammatio & ignitio una semper accidunt.

Olea tenuiora & leviora, e quorum superficie semper exhalat vapor, si forte corpus ignitum admoveatur, flam-

nam statim corripiunt. Illa verum, quæ natura fixiora sunt, non inflammantur, nisi prius calore magno vapores suscitati sint; igiturque in lucernis, ubi densioribus plerumque utimur oleis, opus est ellychniis, quorum modo e superficiebus tanta fit constanter vaporatio, quanta ad flammam nutriendam necessaria — Quanto tenuius & levius, & quanto facilius vaporatur aliquod oleum, tanto purius flammæ (modo ut loquamur communi) pabulum præbet, & præcipue quidem si distillationibus rectificatum sit. Quum enim olea crassiora & impura multum sumi & fuliginis edant deflagrantia, tenuiorum & puriorum pars maxima in flammam convertitur & disparet. In omni autem tenuissimo oleo materia inflammabilis seu flammæ pabulum, magis minusve semper cum aliena materia commistum & confusum, non omne inflammationem subit, sed incombustum ex parte in fuligine deponitur. Sed quamvis olea puriora dant etiam puriorem materiam inflammationis, non ideo sequitur in his flammam ardentiorē esse vel calidiorē; contrarium quidem accidit, nam non solum in oleis at in omni corpore inflammabili ardentior est flamma & calidior, ubi substantia inflammabilis est quodam & certo modo cum alienis materiis confusa & coercita, quam si purior sit & liberior. —

In genere de natura ignis & proprietatibus in summa obscuritate adhuc versamur; forsan & suspicari licet, quod non multo magis de phlogisto materiæ inflammabili & combustibili instruamur. — Notio generalis est, in combustionē alicujus corporis phlogiston ejus evolvi, & in ignem converti elementarem; & phlogiston quidem nihil aliud esse, nisi ignem hunc elementarem cum aliena materia ita conjunctum, ut vires ejus & activitas lateant & coerceantur: notioni autem huic, cum plane hypothetica sit, non desunt facta & observationes quæ fortiter obstant. —

In corporibus phlogisto pene aut omnino expertibus, motu solum & frictione, excitatur ignis, & quidem in quantitate vel gradu quam maximo. — Dum comburantur hæc corpora, quæ phlogiston continent, aliquid aliud præter ignem elementarem plane evolvitur; nam aer, in quo combustio facta est, omnibus suis qualitatibus quam maxime mutatur & inquinatur, quod ex ignis solius præsentia & actione nunquam accidit. Calor sive ignis præsentia & actio in corporibus potest in vacuo, tanquam in aere, excitari; sed ut phlogiston alicujus corporis convertatur in ignem, aer necessario adhibendus est. Et demum illud si verum sit, quod nuper Auctor quidam ingeniosissimus (a) demonstrare conatus est, corporum scilicet facultates ad ignem continendam phlogisto adjecto minutas esse, phlogisto amisso auctas; nonne licet dubitare, an quidem phlogiston nil sit nisi ignis? an inflammatio & combustio nil sint, nisi hujus ignis extricatio? — Eodem Auctore proposita est explicatio combustionis longe diversa, quod scilicet ignis, qui in eo casu excitatur & quasi producitur, non a phlogisto quidem sed ab aere præbeatur circumdante: nam ejus secundum doctrinam aer, magnam ignis quantitatem continens, magna etiam vi phlogiston attrahit; corpore igitur incenso quovis phlogiston ejus evolvi & liberari incipit, evolutum autem ab aere circumdante captatur; at aer phlogiston accipiens, ignem ratione simili deponit, itaque inter aerem corpusque ignitum mutatio fit reciproca; hoc enim phlogiston cedit ignem accepturum, at alterum phlogiston accipiens ignem deponit. — Hanc opinionem, ut mihi videtur, probabilem multis & ingeniosissimis argumentis suffulcit auctor; sed a nostro proposito non licet longius discedere; hoc ostendisse sufficit, esse incertas adhuc notiones de illo in oleis aliisque substantiis inflammationis principio, de cujus natura a multis (pro re tam incerta) paullo liberius & latius differi solet.

(a) Vid. A treatise on Animal heat by Adair Crawford A. M. Lond.

Oleorum inflammatio & combustio aliam analysis speciem horum corporum indicant, & imprimis phlogisti, quæcunque sit natura, ex oleorum combustionem plane invenimus, id principium eorum in compositionem copiose intrasse, sed dum conflagrante oleo phlogiston ex maxima parte dissipatum sit, sic cum eo simul aliorum ingredientium pars maxima etiam avolat & amittitur; quod præcipue relinquitur, fuligo est.

Olea, quamvis multo aptiora sint ustioni, quam pleræque aliæ materiæ, nunquam ipsa combustionem à toto decomponi videntur; fuliginem enim eorum in vasis clausis distillando, præter aquam seu phlegma, obtinetur etiam olei plus vel minus, quod inflammatione modo dissipatum non decompositum fuerat. — Distillatione fuliginis peracta, relinquitur, quod purissimum & simplicissimum fuligo habet, & certe tam simplex, ut non sine difficultate decompositionem ulterius patiatur. — In vasis clausis nullo caloris vi potest alterationem longius subire, in aperto autem aere, & admoto corpore ignito, comburitur, sed difficulter quidem & tarde, sine flamma, & sine fumo; finita combustionem terræ albæ parva quantitas relinquitur. —


Ab illustrissimo STAHL, multisque ipsius sectatoribus, hæc fuligo, ex omnibus materiis quæ comburi possunt, pro simplicissima habita est, ac quidem pro ipso puro phlogisto; cujus igitur in hujus combustionem analysis & decompositionem patere credunt. — Ignis enim, dicunt, evolvitur, naturamque suam elementarem & activam resumit; terra autem relinquitur; phlogiston ergo ex igne cum terra compositum esse. — Desunt verum multa, ut hæc stabiliatur theoria. — Ad fuliginem enim comburendam, dum aeris presentia opus sit, sic ab hac ut ab omni alia combustionem ille aer tali modo mutatur, ut ab igne nunquam fit. — Nam aer quidem, quum nihil acceperit nisi ignem, volumine expanditur, & rarior fit; sed aliis respectis

respectis idem ac antea manet; & refrigeratus omnibus suis qualitatibus gaudet. Non ita est, ubi ad combustionem accessorius fuit; nam quævis, & quam pura sit, materia phlogistica quæ comburitur, aer omnino ineptus respirationi redditur, flammam non ulterius sustinere potest, calcem præcipitat quæ in aqua soluta est, & majorem prorsus similitudinem habet vaporibus, qui aer fixus & *gases* nominantur, quam aeri puro & atmosphærico. Forsan ab experimentis in hunc aerem institutis, qui ad combustionem inservit, plus disci posset de phlogisti vera natura, quam omne quod hucusque in lucem editum est.

Si oleorum combustio sub operculis facta sit, observavi semper, quod una cum fuligine deponatur etiam in parietibus parva quantitas phlegmatis acidi; itaque, quamvis combustionem magna ingredientium pars necessario dissipatur, hæc tamen oleorum analysi eadem fere producta ac distillatio præbere videtur; at de principiis, quæ immediata sunt in oleorum compositione, vix quidem certiores facti sumus. — Hanc autem analysin meditans docuit nuper chymicus omnino celeberrimus, quod e phlogisto vel, quod ei par & idem videtur, ex pura fuligine cum aqua sola conjuncta, novum possit recomponi & regenerari oleum, & hanc doctrinam facto confirmare credidit. — Si distillatione decomponatur illa materia colorans, quæ Cœruleum Borussicum appellatur, præter aquam & alkali volatile parva quantitas olei etiam obtinetur; sed in cœruleo Borussico nihil præter carbonem seu fuliginem ineest, quod oleum præbere potest; & ipse carbo, jam antea igne calcinatus omni oleo, ut videtur, privari debuit, igiturque, opinante auctore nostro, nova formatio olei hoc in casu perficitur, dum intermedio forte alkali volatili, aqua quodam modo cum phlogisto jungatur. — Hæc inventio tam pulchra videtur, & in oleorum naturam & compositionem tantum dare lucis; nomen etiam

famaque auctoris adeo celebria, ut nemo, quoad credo, nisi invito animo, possit eam in dubitationem revocare; sed oportet in talibus rebus considerate semper procedere, & numquam sine summa adhibita attentione de aliquo tanti momenti in scientia concludere. Ipse etiam coeruleum Borussicum distillans oleum quoque elici conspexi, at hoc quidem in minima quantitate, & non quidem semper, nonnunquam enim præter quod phlegma stillatum, odorem haberet quemdam empyreumaticum, nihil aliud oleosum, nihil olei ad instar, inveni. — Et hoc quidem mihi dubitandum semper visum est, an carbo (vegetalis sit an animalis naturæ) qui coerulei in compositionem intravit, ignis præterita actione, tam mutata fuerit, ut non postea olei parvam quantitatem continere & edere posset: e plerisque carbonis & fuliginis generibus aliquid oleosum semper fere elicere possibile est. — Experimenta certe plura observationesque multæ adhuc defunt, ut pro re habeatur certa, oleum e phlogisto cum aqua componi, & his arte conjunctis novum posse formari oleum.

Consideratis autem satis effectibus quos præcipue in olea exhibit ignis, licet pergamus nunc illos examinare quos edit cum aliis corporibus mistura.



C A P. III.

De Misturæ in olea effectibus.

Multæ & variæ quamvis extant oleorum cum aliis substantiis compositiones, & harum quamvis magna sæpe nobis utilitas, investigatio haud infructuosa parva tamen attentione hucusque considerantur. — Verum hujus differentiationis fines non ultra hujus rei superficiem adspicere permittunt.

Sine

Sine aliquo intermedio olea cum aqua vix miscenda creduntur: cum aqua agitata oleum quidem diffunditur, & inpræsenti speciem exhibet liquoris albi sive emulsionis, at cessata agitatione separatio immediate insequitur. — De multis verum oleis observavi hanc separationem neque tam subitam esse, neque tam perfectam ac vulgo creditur: lini enim aliisque ejusmodi oleis desiccationi spontaneæ prioribus cum aquæ quantitate duplici agitatis, semper inveni olei non solum paulo mutari colorem, sed & turbidam reddi aquam, & depositionem cujusdam materiæ mucilaginosæ fieri. Verum si aqua in olea actionem unquam exerceat, hæc tum est maxime conspicua, ubi calor certus adhibetur: quum enim olei ejusmodi parva quantitas cum aquæ pondere quintuplici vel sextuplici in vase super ignem imponatur, sique aqua per aliquod tempus ebulliat, colorem succineum paulatim induit, qui eo obscurior fit quo longius ebullit, magisque vaporazione minuitur; hac autem ita colorata aqua in vasis clausis distillationi subjecta, quæ distillat sine colore est, sed & gustu & odore oleum adhuc inesse, conjunctum quidem & quasi solutum, plane percipitur.

Aeris certa quantitas univérse in compositionem oleorum intrat; ex omnibus calore potest elci; extractus autem illius naturæ videtur ac id *gas* sive aer quod hodie phlogisticatum appellatur. — Sed præter aerem qui ita constitutioni & compositioni oleorum necessarius est, Hales olim observavit, pleraque horum majorem insuper quantitatem aeris absorbere & in suam compositionem admittere posse. — Et e variis generibus aeris sive *gasum* quorum naturam & indolem experimenta recentiora explicaverunt, alia quidem magis alia minus apta ad hanc conjunctionem videntur. E pluribus experimentis quæ in hoc institui, pauca sufficere possunt pro exemplis hujus diversitatis, —

Olei

Olei olivarum paucas uncias postquam aliquod tempus in calore aquæ bullientis exposuissē, scilicet ut aere superfluo quam maxime liberarem, in phiolam vitream immisi, cujus in parietibus spatia notata erant quæ occupare solebant aquæ singulæ uncia, hanc autem phiolam cujus dimidium oleo, dimidium aere communi sive atmospherico plenum, inversam posui in vase quod oleo quoque impletum fuerat. — Post aliquot horas aer cum oleo inclusus minorem spatium occupavit, scilicet illud quod occupare solet aquæ semiuncia; at amplius quum etiam per totam noctem in eodem situ maneret aeris non absorbit.

Itaque eadem cura & cautione habitis similem phiolam oleo olivarum implevi, sed pro aere atmospherico quem in priore reliqueram, in hanc per tubum curvatum aerem transire feci quem e pulmonibus expirabam, quantum phiolæ dimidium occuparet, & tres post horas inveni oleum aeris absorbuisset quantitatem expressam spatio quod occupabat in phiola $\frac{1}{8}$ aquæ uncia; neque longius manens plus absorbere potuit. —

Eodem modo olei similem quantitatem inclusi, cum eo *gasi* (sive ut communius appellatur aere fixo) quod e creta adjecto vitrioli acido extricatur, cujus non minorem quantitatem oleum absorbit quam quæ spatium aquæ uncia & $\frac{3}{4}$ in phiola occupare solebat. —

E gasē sive illo aere inflammabili quem acidum nitri cum æthere miscens extricaveram, uncia & $\frac{1}{8}$ oleum absorbit. —

Gasē quod edit acidum vitriolicum super carbone infusum, non ultra $\frac{1}{4}$ uncia spatium oleo absorptum fuit, at hoc aere olei color magis quam aliis mutatus visus est. —

Quum

Quum oleum ei gasi expositum fuerit quod e solo alkali volatili calore extricatur, gasis disparuit & absorptum fuit quantum aquæ unius uncix & dimidii spatium in phiola impleverat, & in hoc casu oleum in saponis speciem prorsus conversum fuit.

In aliis tentaminibus quæ & in oleis diversis & aeris diversis speciebus feceram, similem diversitatem inveni, quod ad affinitates quæ hæc inter corpora extant; & quidem phænomena in his misturis sese interdum ostenderunt, quæ posthac fortassæ consideratione haud indigna reperientur, sed hucusque novæ & in chemia fere incognitæ sunt hujusmodi misturæ. *cum*

Olea varia tam essentialia quam pingua connatus sum cum terra vitrificabili miscere, at nulla visa est affinitas inter has substantias existere. — Verum terræ calcareæ, sive in statu naturali sint, sive calcinatæ, majorem ostendunt dispositionem sese cum oleis conjungendi. Terra hujusmodi quæ non calcinata est in oleo quum imponatur, partem sui aeris amittit, quo parva fit effervescentia, & olei absorbet quantitatem, qua vix posthac, & non nisi ignis actione, liberari potest: si autem in pulverem prius redacta cum oleo pingui trituratione sit, tum quidem olei cum certa quantitate sese perfecte conjungit, massaque sit quæ quibusdam in artibus haud est inutilis: hujusmodi compositione, cretæ scilicet cum oleo lini, vitriarii ad vitri laminas in fenestris aptandas utuntur, cujus autem massæ, parte fluidiore paulatim dissipata, restat materia sicca tenax vento & imbribus impenetrabilis. Si terra calcarea quæ calcinata fuit seu calx viva in oleo submersa sit, nullo fere alio modo quam eadem in statu naturali oleum afficitur, nihil accidit illius caloris & intumescentiæ quæ cum aqua exhibere solet. — Sed aqua calcis (quæ aqua nihil quidem nisi parvam quantitatem hujus terræ continet,) si cum oleo quovis pingui agitetur,

D

tum

tum vero saponis ad instar oleum cum terra per omne aquæ volumen diffunditur. — In eo enim casu terra & oleum per aquam simul agitata, in particulas minutas dividuntur, itaque quæ est inter ea affinitas majorem effectum exhibet: verum eam affinitatem non e fortissimis esse ex hoc videtur, quod post aliquod tempus olei pars sese separet, & in superficie natet nulla qualitate mutata. —

Terram argillosam purissimam, ex alumine obtentam, non magis quam alias terras in oleis dissolubilem inveni, sed trituratione hæc quoque cum oleis pinguibus quodam modo conjungi potest, & quum calcinatione ex omni aliena materia liberata sit, cum oleo ita trituratione in arte pictoria albi causa coloris nuper laudata est. —

Terræ & calcarii & argillofi generis sed præcipue argillofi dispositione gaudere videntur, cum certa parte ex quibusdam oleis sese potissimum conjungendi, cum eo scilicet muco, parteve resinosa, quæ inest in oleis desiccativis appellatis, cui & maxime tribuenda est eorum peculiaris indoles. — Oleum lini cum terra hujus modi triturando pars quæ emanat multo minus prona est ad desiccationem quam antea devenit, & si repetatur cum nova terra trituratione, oleum quidem hac sua proprietate prorsus orbari potest.

Cum materiis salinis in genere oleis est semper affinitas, sed hujus vires pro salibus diversis multum variantur, & olea quidem, pro natura & indolis varietate, diverso quoque modo afficiuntur salibus. —

Acidum vitrioli dum forte & concentratum sit omne oleum cui adjectum est fortiter aggreditur: ebullitio fit cum calore, vaporesque odore sulphureo empyreumatico exoriuntur, hujus autem misturæ phænomena sunt varia olei secundum genus quo facta est. —

Ex

Ex oleis pinguibus & unctuosis, ea minus hoc acido afficiuntur, quæ in sua compositione minimum habent materiæ volatilis, quæ minime ad desiccationem & ad ranciditatem prona sunt, quæ & minore frigore congelantur, talia sunt olivarum, amygdalarum dulcium, nec non multa quæ in animalium corporibus reperiuntur. Sed in hæc etiam acidi vitrioli actio satis semper conspicua est, nam quum calorem vaporesque suscitet, tum olei colorem in rubrum nigricantem convertit, spissius reddit ad instar fere saponis, & hæc mixtura dum in aqua sub specie lactea diffundi tum vini spiritu prorsus dissolvi possit.

Alia olea pingua quæ facilius desiccantur ut cannabis vel lini, sese celerius multo & violentius cum acido vitrioli conjungunt, & eo usque inspissantur ut resini speciem induant. —

Olea denique essentialia ex omnibus aliis maxima vi, calore, effervescencia, cum hoc acido sese commiscunt, cum eo composita facientia resinorum ad instar, colore rubro, & odore pungente. — Verum si loco olei essentialis adjiciatur hoc acidum vel balsamo naturali, vel oleo quod longa conservatione balsami resumit naturam, tum majore etiam violentia fit mixtura, ita quidem ut si quantitas paulo amplior sit, & si agitatione promoveatur, tota massa flammam nonnunquam suscipiat, & in vaporibus dissipetur, carbone solo restante.

Olea pingua quæ igni exposita mutationem subeunt, cum acido vitrioli commista odorem foedum & empyreumaticum ex magna parte amittunt.

Acidum nitri concentratum olea omnia aggreditur, & vi majore etiam quam vitriolicum. — Olea essentialia omnia, & ex pinguibus illa quæ ad desiccationem proniora sunt, cum hoc acido sese commiscunt, non modo

cum calore & effervescencia, sed & sub certis conditionibus inflammantur statim & comburuntur. — Ad exhibendum hoc phænomenon opus est vase talis figuræ ut quam maxima olei superficies ad acidi actionem exponatur, & utriusque oportet quantitate non nimis parva uti. — Ad unam olei unciam inflammandam acidi semiuncia potest adjici & ea si non suffecerit æquanda sunt utriusque pondera. — Olea alia pingua ut olivarum & amygdalarum quamvis sese satis facile & calore etiam & effervescencia ad nitri acidum adjungunt, illo tamen solo nunquam inflammantur: hoc verum quoque effici potest, si, loco nitrosi puri, acidum adhibeatur, quod ex partibus æqualibus nitrosi & vitriolici compositum est, maxime si oleo ita commisto super adjiciatur nitrosi puri quam minima dosis. —

Totius hujus phænomeni oleorum inflammationis per acida explicatio satis facilis videtur. — Omni in casu ubi duo corpora violenter & mutuo in sese agunt, calor suscitatur, quum verum oleum cum acido concentrato potissimum cum nitroso sese conjungat tanta est particularum frictio, ut calor insequatur illi ignitionis æqualis; sed dum corpus utrumque & præcipue oleum natura sit inflammabile, tota hæc massa quam necessario flammam suscipit. — Acidum autem vitriolicum nitroso adjunctum quasdam ex his inflammationes adjuvat, fortasse quum summa affinitate cum aqua gaudens, aut oleum aut acidum nitrosum dephlegmet itaque magis aptum combustioni reddat.

Acidum marinum ut & vegetabile parum actionis in olea quæcunque ostendunt, & cum his vix conjungi possunt; at hæc acida nunquam ad alia pariter concentrata videntur & si in eo statu invenirentur eorum forsan in olea effectus haud minus essent conspicui. — Acido vegetabili revera tanta est ex sua natura cum oleo affinitas, ut nunquam sine olei admistione inveniatur, e qua quidem hujus acidi peculiares qualitates præcipue originem trahere verisimile est.

Acidi

Acidi vitriolici cum oleo compositum quum distillationi subiectum sit, corpus utrumque ex conjunctione multum mutatum fuisse videtur. — In vas enim recipiens distillat primum acidum aquosum & sulphureum, insequitur oleum, odore empyreumatico, tum acidum fortius sed sulphureum semper & volatile, postea oleum crassissimum, nigrum, odore fortissimo, & demum sublimatur sulphuris veri quantitas, restat autem carbonis pondus majus quam si oleum solum distillatum esset.

Attentio chymicorum nuper non parum occupata est, de incepto ut inter acida & olea efficerentur quædam composita quæ analogæ essent, iis (saponibus vocatis,) quæ ex oleis cum diversis alkali speciebus constant, (de quibus statim disserturi sumus); & hujus quidem incepti successus non modo scientiæ chymicæ optabilis esset accessio, sed & quam verisimile est, variis & diversis in vita communi artibus, ob proprietates quibus hi acidi saponæ gauderent. — In hoc persequendo consilio tentamina jam facta sunt cum omnibus acidis, in pleraque diversorum generum olea, & ex iis nonnulla sane feliciter satis successerunt, ut non absque spe res longius persequeretur. De oleo pingui autem quocunque nemo adhuc potuit, aut cum vegetabili aut marino acido compositum saponaceum efficere, & cum acido nitri, licet conjunctio effecta sit, compositum tamen, bituminis speciem æmulans, prorsus caret illa miscibilitate cum aqua, quæ saponum est inter characteres præcipuos, & e qua horum compositorum utilitas ex maxima parte pendet. —

Cum acido vitriolico res feliciter succedit, & saponæ veri haud magno labore effecti sunt. — Mittantur hujus acidi concentrati in mortario uncie duæ, cui paulatim adjiciatur & continuo trititando olei pinguis cujusvis, quod antea fere ad ebullitionem calefactum est, uncie tres vel quatuor: massa fiet nigra, spissa, terebinthinæ ad in-

star. — Hæc tum solvenda est in aquæ bullientis unciis quinque vel sex, ut ab acido superfluo lavetur; refrigerata aqua, sapo in superficie natabit, colore luteo, cum aqua perfecte miscibilis, vini spiritu solubilis & (si bene ex acido superabundante lavatus sit) durior & firmior ex custodia deveniens. Ejusdem naturæ sapo & quod ad speciem sane pulchrior obtinetur, si loco ipsius olei sapo communis ex oleo & alkali constans ad hoc propositum adhibeatur. — Huic enim adjecto acido vitriolico, sapo (ut mox videbimus,) decomponitur, & dum plus acidi quam satis ad decompositionem adjiciatur, quod superest cum oleo separato sese conjungit, & saponem acidum extempore format, qui postea solutionibus & evaporationibus repetitis, tum vini spiritu, tum aqua pura, omni salina materia liberatus, colorem induit album, proprietatibusque omnibus saponaceis gaudet.

Cum eodem acido & iisdem fere modis ex oleis quoque æthereis & essentialibus quibuscunque saponem item præparati sunt. — Oleum enim ut in priori casu, trituratione & paulatim cum acido miscetur, at sine calore, & quidem ob violentiam qua acidum solet hæc olea aggredi, oportet sedulo curam adhiberi ut lente & quasi guttatim immittatur oleum. — Mistura autem finita aqua pene bulliente solvenda est, scilicet ut ab acido superfluo liberetur, qua postea refrigerata sapo in superficie natans coacervatur, solidus magis vel minus pro olei natura quo usi fuerimus, & saponaceis qualitatibus quam maxime præditus. —

Ex aliis acidis nemo hucusque potuit cum oleis æthereis magis quam pinguibus saponem efficere.

Sales alkalini in omnia olea plus minusve effectus exhibent, & cum omnibus conjungi possunt, at hæc composita, quæ communiter saponem appellantur, magis sunt
vel

vel minus perfecta pro natura salis & olei e quibus efficiuntur. —

Sales alkalini fixi, etiam ubi cum aquæ certa quantitate conjuncti sunt, cum oleo omni pinguiore facile sese commiscunt, & tempore concesso, etiam sine calore hæc conjunctio fieri potest. — Nec tamen ideo necessarium est ut alkali quo utimur causticum sit, licet in eo casu sapo perfectior fiat, qua propter saponum fabricantes caustico semper utuntur.

Sapo purissimus, & qui in medicina maxime adhibetur, olei olivarum duas partes cum lixivii caustici una miscendo præparatur, mixtura subinde agitata intra dies septem vel octo duritiem & soliditatem convenientem acquirit. — Lixivium autem causticum conficitur coquendo in aquæ partibus duodecim alkali fossilis five salis Sodæ partem unam, & calcis vivæ partes duas, verum hic liquor per aliquod tempus coctus, deinde per chartam colatur posteaque supra ignem impositus vaporazione spissatur, eo ut mensura quæ unciam aquæ continebat hujus unciam & drachmas duas vel tres contineat.

Ubi autem majore quantitate sapo preparandus est, ut apud fabricantes, tum calore adhibito opus multum acceleratur, nec in eo casu necessarium est lixivium vaporazione tam concentratum. — Verum si lixivium & oleum supra ignem misceantur, oportet, ne oleum empyreumaticum reddatur, ut ignis lenior sit & cura & attentione gubernetur. — Sapo hujusmodi qui recte præparatus fuit solidus est, albus, & firmus, in aere non mollescit, nec aliquid imbibit humiditatis, in aqua prorsus diffunditur nullis olei particulis in superficie natantibus.

Sed oleum olivarum dum carius sit; multi quoque sapones ex oleis minoris pretii fabricantur, & nullum est
oleum

oleum pingue e quo fabricari non possunt: hi saponēs verum, colore odore, & duritie exceptis, omnes inter se satis similes sunt, iisdem fere proprietatibus gaudentes. —

Omnis sapo, ex oleo cum alkali constans, utriusque quodam modo qualitates continet, eas autem ex compositione temperatas & minutas. — Alkali enim non solum causticitatem sed multum salinæ indolis deposuit, oleum minus inflammabile redditum in aqua diffundi & vini spiritu dissolvi potest. —

In saponis præparatione alkali vegetabile fixum non minus quam minerale potest adhiberi; & adhibetur quidem, sed dum hic salex aere humiditatem avidè imbibat, hi saponēs in solida forma non possunt conservari. Omnes saponēs alkalini facile decomponuntur, vel distillatione, vel mistura cum aliqua materia quæ quam oleum affinitate fortiore cum alkali gaudet.

Distillationi subiecto sapone, distillatur primum aqua, quæ in ejus compositionem intraverat, colore subflavo, odore acri, & paululum alkali plane imbuta: insequitur oleum ab ignis actione, ut solet, mutatum, colore rubro, gustu & odore empyreumatico, & distillatione progrediente magis magisque crassescens. Restat in cucurbita massa nigra, ex olei carbone & sale alkalino composita, qua igne aperto combusta, nihil fere præter alkali purum relinquitur. Acida quum ex omnibus materiis maximam cum alkali affinitatem habeant, sic ad saponēs mistura decomponendos, ex omnibus communissime & commodissime adhibentur. — Ad hoc rectè efficiendum oportet saponem antea in aquæ quantitate sufficiente diffundi, tum paulatim & agitatione frequente adjicitur acidum, cujus pro singula accessione in liquore formatur quasi coaguli species; qua cessante plus acidi non licet adjicere; oleum quidem in superficiem jamjam assurgit, eodem

eodem colore, odore aliisque qualitatibus quam antea gaudens, at inflammatum fortiolem & lucidiorem flammam exhibet & vini spiritu facile & ex integro solubile est. — Omne acidum hanc decompositionem facile perficit, &, oleo separato, restat in liquore sal neuter, qui cum saponis basi alkalina formatus varius est pro acidi genere quo usi fuerimus. —

Saponis licet magna sit in vita & artibus utilitas, tamen ut eo commode utamur, necessarium est aquam, in qua eum diffusuri sumus ad lixivium faciendum, quam maxime puram esse, & præcipuè ab omni salina impregnatione liberam; in ejusmodi enim aqua nunquam bene dissolvitur, & ex hac re quidem ex magna parte de puritate aquæ potest judicari. — In aqua e puteis hausta, omni-que aqua aliquid seleniticæ vel gypsæ naturæ continente, sapo diffundi nequit, & si cum hujusmodi aqua tentamen factum sit saponis insequitur decompositio, dum selenitis vel gypsi acidum sese quodam modo cum alkali saponis, conjungat: verum separatio solum ex parte fit, quando aqua multa selenitica materia jam impregnata, sapo nunquam in ea satis diffunditur, ut in tota massa decompositionem patiatur. —

Aquæ, quæ minerales dicuntur sive quæ materiis metallicis impregnantur, nihilo magis idoneæ sunt ad lixivium saponicum faciendum, & in saponem similes effectus, similem decompositionem præbent. — Quæ autem aquæ sale neutra impregnantur, ut sale marino vel Glauberi, in saponem nullam fere actionem exhibent, his enim neque diffunditur, neque decomponitur: quum in his acidum, cum alkali jam conjunctum sit, & nihil adsit quare deferat suam basin: & sal neuter quum aqua solubiliior sapone sit, adeoque quasi necessario sapo intactus & insolutus manet. —

Sapones alkalini omnes possunt magis minusve vini spiritu dissolvi, at imperfecte quidem, dum hic liquor in oleum fere solum actionem exerceat, si autem spiritus aquæ certa quantitate dilutus fuerit, tum adest etiam alkali menstruum, & totius saponis solutio perfecta & pellucida effici potest. — Sed quum sæpe in vini spiritu parva insit cujusdem acidi quantitas, quapropter minus perfecte saponem dissolvit, in tali casu oportet modo paucillum alkali fixi spiritui adjici, itaque amoto impedimento solutio perfecta redditur. —

Cum alkali volatili etiam tamquam cum fixis olea pingua conjungi possunt, verum hæ compositiones non eadem efficiuntur facilitate, & nec in chemia nec in artibus multum hucusque cognitæ sunt. — Variis modis postquam frustra conatus eram oleum pingue directe & immediate cum alkali volatili conjungere, in mentem mihi venit, si cum sapone communi in aqua diffusulo misceretur salis ammoniaci solutio, hujus acidum marinum debere, suam basin relinquere, seseque ob majorem affinitatem cum alkali fixo saponis conjungere, ita ut inter alkali volatile & oleum liberatum conjunctio forsan efficeretur. — Tentamen feci, saponis albi & salis ammoniaci pondera æqualia adhibens. — His in solutione commistis, exorta est & quidem subito materia saponacea, & in liquoris superficie natavit, quam postea in massa coacervavi, & rem vere prospere successisse credebam, maxime ubi ille regeneratus sapo cum calce viva permixtus, odore plane indicavit alkali volatile in sua massa includi. — At postea liquore salino, in quo facta erat solutio, evaporato, tum quidem loco salis marini qui, experimento feliciter peracto, relinqui debebat, salem ammoniacum eundem quo usus eram solum inveni, — Nonnulla alia experimenta eadem intentione institui, quorum in quibusdam phænomena vidi observatione haud indigna, at quæ ad narranda hic non locus datur. — Saponem denique veram ex alkali volatili cum

cum oleo conficere aggressus sum, & modo satis simplici. — In libra aquæ bullientis saponis albi quam maximam diffudi quantitatem, & deinceps, acido vitriolico paulatim adjecto, eum saponem totum decomposui, oleo autem ita liberato & in liquoris superficie natante alkali volatile adjeci, & quidem sub illa forma concreta quæ sal volatile seu vulgo sal Anglicum appellatur. — Secuta est quædam effervescentia, dum acidi vitriolici plus adjecissem quam par esset ad saponem decomponendum, sed ubi, alkali volatilis satis adjecto, liquor tandem neuter factus est, tum hujus alkali excessus in oleum convertit suam actionem, & brevi tempore in verum mutavit saponem, quem deinde in superficie natantem coacervavi, & expressione inter chartulas ita desiccavi, ut vix minus firmus & durus ac sapo communis visus sit. — Liquore postea evaporato, duas salis species, chrystallis distinctis, inveni, primum Glauberi salem, qui ex alkali fixo saponis cum acido vitriolico constabat, alterum autem salem quemdam vitriolico-amnioniacum qui ex eodem acido cum alkali volatili superabundante formatus erat. —

Sapo ita præparatus odorem alkali volatilis fortem habet, ex aere humiditatem facile imbibit, colore est flavo & similis ei speciei saponis mollioris qui cum alkali fixo nonnunquam præparatur. — In aqua diffundit sese sed paulo difficilius quam sapo communis: hanc diffusionem promovet paululum vini spiritus adjectum, verum is liquor neque per se neque cum aqua commistus hunc saponem perfecte dissolvere visus est. —

Olea essentialia & distillata possunt etiam ut pingua cum alkali & fixo & volatili conjungi, sed hæc composita quæ saponaceæ etiam naturæ sunt, neque eadem facilitate conficiuntur, neque æque observata fuerunt. —

Eorum illud quod maxime hucusque consideratum saponum ille est a Starkey nominatus, qui ex Terebinthinæ oleo essentiali cum alkali fixo efficitur. Ad hunc formandum Starkey mandat solum ut posita in vase conveniente alkali sicci quantitate, supra fundatur olei Terebinthinæ quatuor vel quinque digitorum mensuram usque ad altitudinem, opus reliquum tempore conficitur, & non nisi post aliquot menses evenit, ut compositione seu conjunctione incepta reperiat in superficie parva quantitas saponis colore albicante. — Chemici recentiores, a quibus plus forsitan virtutis & præstantiæ huic saponi quam merito tributum est, summam operam dederunt, ut via & modis brevioribus eum efficere possint. — Ex his autem felicissime videtur res successisse clarissimo Beaumé, qui præscribit ut assidue trituretur alkali cum olei parva quantitate, eademque paulatim augenda, eo ut compositio eam habeat densitatem quæ saponi convenire videtur. — Celeberrimus Macquer de hac re disserens opinatur confectionem veri saponis Starkey, compositi sive illius ex oleo Terebinthinæ cum alkali fixo qualis plerique sibi animis finxerunt, rem esse vere impossibilem. --- Quod autem cl. Beaume de hoc saponum fabricando notat, illam notionem firmare videtur. Hac enim in operatione trituratione ab illo laudata utilis videtur esse, solum propter id quod ita facilius & celerius dissipetur olei pars tenuior; & præterea quidem si, ut docet Beaume, saponum etiam breviori conficiatur tempore, dum simul cum oleo adjiciatur resinæ sive Balsami quantitas, nonne conspicuum est hanc cum alkali conjunctionem non ex tota olei massa fieri, sed ex ea solum parte quæ crassior & minus volatilis est? — Nullum aliud olei essentialis cum alkali fixo compositum adhuc excogitatum est, aut in lucem editum, sed easdem convenire observationes ad omnia hujusmodi probabile videtur. —

Oleis essentialibus cum alkali volatili conjungendis nemo fere adhuc operam dedit, ejusmodi tamen quædam compo-

composita imperfectiora in medicina usurpari solent. — Hujus naturæ sunt spiritus elixeresque diversi volatiles, oleosi, aromatici dicti, qui præparantur adjiciendo alkali volatilis quantitatem spiritui vini, quo antea olea, quædam essentialia dissoluta fuerant. — Ejusdem fere generis est sal volatilis aromaticus, qui fit sublimando alkali volatile ex oleo quovis essentiali cum quo antea commissum est. — Ad hæc licet etiam addere eam præparationem *Eau de Luce* appellatam, in quam oleum quod intrat, quamvis haud ex essentialibus sit, tamen distillatione antea rectificatum multis illi similibus proprietatibus gaudet. — Ut præparetur *l'Eau de Luce*, dissolvere oportet in bene rectificato vini spiritu saponis albi communis, pro singulis spiritus unciiis, grana duo vel tria, cui liquori dein adjiciendum est olei succini rectificati quantum solvere potest; per chartam postea colatus commiscendus est liquor paulatim & agitandò cum spiritu salis ammoniaci caustici donec præparationi color sit lacteus, odor quam maxime pungens. — Hic liquor ita confectus quasi liquidus quidem est sapo, ex alkali volatili cum oleo æthereo constans; at in hoc, & omnibus ejusmodi præparationibus, evidens est, quod vini spiritus vel prorsus necessarius sit, vel saltem multum adjuvet, quo intermedio, dum oleum in solutione teneatur, cum alkali facilius conjunctio efficitur. — Verum res, si operæ pretium esset, non impossibilis videtur, sine aliquo intermedio oleum essentialiale aut æthereum cum alkali volatili conjungere. —

Olea & pinguiâ & essentialia varios sales neutros dissolvere, & cum his conjungi possunt; hæc composita autem & hæc oleorum facultas parum a chemicis indagata sunt. — Quum me tum de hac re tum de aliis certiores reddere vellem, diversa experimenta in misturas oleorum cum salibus designabam, & eorum quidem executionem incipiebam, sed dum mihi defuerint adhuc & otium & occasio, non possum nisi paucas & minoris momenti observationes in lucem proferre. —

qui Salium neutrorum maxima pars in sua compositione aeris quantitatem videntur continere, ~~que~~ in oleo submerso sale extricatur, præcipue si calefactum sit oleum. — Calente oleo sales amittunt etiam paulatim aquam quæ ad chrystalizationem inferviebat, sic ut in oleo quodam modo calcinationem subeant. — Omnis fere sal neuter in oleo submersus hujus fluidi plus minusve imbibit, e quo sæpe non sine difficultate postea liberari potest. — Ob eas autem aliasque causas difficile est justam determinare quantitatem, quam cujusvis salis oleum aliquod solvere potest: nec diversis quamvis modis in hac intentione usus sim, aliquid possum certi de hoc affirmare. —

in Oleis pinguibus non facile neque multum solubiles videntur hi sales neutri quibus basis est acidum vitriolicum. — Vitriola metallica, ut cupri, ferri, zinci, si chrystallorum sub forma oleo calefacto submersa sint, aera deponunt & aquam, verum si his antea torrefactione privata essent nihil quidem ultra e suo pondere amittunt. — Ex alumine etiam oleo calefacto submerso hæc eadem facile & magna in quantitate extricantur, & sese dissipant, alumen autem multum olei imbibit, nullam solutionem patitur. — E sale autem Glauberi, aqua chrystalizationis jam privato, olei lini drachmæ duæ (calore aquæ bullientis) tria circiter grana dissolverunt. Sed omnium hujus generis salium tartarum vitriolatum præcipue est oleis pinguibus solubile; hujus enim olei lini drachmis duabus (calore aquæ bullientis) grana sex, olei olivarum eadem quantitate grana octo, facile dissolvuntur, olei autem utriusque color multum mutatur. —

Nitrum oleis pinguibus prorsus insolubile, sal commune marinum & sal ammoniacum vix magis affici videntur. —

Subli-

Sublimati corrosivi parva est solutio ; si autem olei calor eum aqua bullientis quam minimum excefferit, totus liquor colore fit nigerrimo : & quod sublimati insolutum restat, oleo sic imbuitur ut ex eo nisi nova sublimatione non postea liberari possit.

Tartari chrystallorum sex aut septem grana, ut mihi videbatur, possunt olei lini drachmis tribus (& calore ut antea) dissolvi, & olei olivarum quantitate simili quantitas fere similis. —

Sal seu saccharum, ut appellatur, saturni omni oleo pingui magis minusve solubile est, hujus autem salis quæ pars insoluta restat non minus cum olei quantitate etiam conjungitur, speciem exhibens saponis, spissitudine mellis ad instar.

De pluribus salibus, neutris ut vitriolo albo & coeruleo, præcipue vero saccharo saturni, observare licet eos cum oleo quovis pingui commistos, id colore privare, & aquæ fere ad instar pallidum & pellucidum reddere. —

Saccharum commune omni oleo pingui prorsus insolubile videtur. —

Ex essentialium genere oleum Terebinthinæ, quo solo in hujusmodi tentaminibus usus sum, varios sales neutros quoque dissolvit. — Hujus olei drachmis duabus (calore aquæ bullientis) sal Glauberi immersus duo fere grana e suo pondere amisit, & in Tartarum vitriolatum similis olei quantitas similem effectum præbuit. — Verum alumen nullam solutionem passum est, & vitriola metallica e pondere quamvis amiserunt, ex iis tamen quum multum extricaretur aeris, incertum videbatur an quædam vera solutio accidisse. —

Nitrum

Nitrum visum est oleo terebinthinæ etiam ac oleis pinguibus fere vel prorsus insolubile. —

Sublimati corrosivi singulæ olei drachmæ singula grana facile dissolverunt, neque tamen, ut cum oleo pingui, denigratus est liquor licet etiam calor similis adhibitus sit. —

Tartari chrystallorum parva accidit solutio, & saccharum commune oleis pinguibus insolubile ex terebinthinæ oleo quandam solutionem patitur. —

At ex omnibus salibus quos oleo terebinthinæ dissolvere conatus sum, saccharum saturni maxime solubile videtur, atque hujus pars quæ insoluta restat cum olei quantitate perfecte conjungitur, in massam duram concrescens, & formam sacchari chrystalizati emulans. —

Olea omnis generis in sulphur agunt, & cum eo conjungi possunt; pingua autem olea maximam quantitatem dissolvunt: cum quovis eorum, & calore ad sulphuris fusionem sufficiente, pondus conjungi potest ponderi olei fere æquale. — Verum oleis essentialibus vix amplius quam sexta sui ponderis pars in solutione tenetur, quod enim huic super est oleo refrigerato præcipitatur. —

Hæc omnia composita sulphuris balsama in genere nominata sunt. —

Hæc autem balsama distillando apparet, sulphur cum oleo ita conjunctum decompositionem quidem subiisse, nullum saltem sulphure balsamo obtineri potest, at eadem fere productiones distillantur ac si distillationi subjiceretur oleum cum acidi paululum vitriolici antea commistum. — Hoc autem factum licet longum jam tempus in lucem editum sit, & licet in balsamorum sulphuris decompositione vel analysi pleraque sese presentent singularia, nemine tamen hæc res diligenter examinata est. —

In

In nonnullas materias metallicas olea præcipue pinguiora actionem præbent, & earum quidem solutionem efficiunt: verum hos effectus vix unquam ostendunt vel olea essentialia vel pingua quæ distillando aut coquendo mutata sunt. — Hæ metallorum oleo solutiones a plerisque & recte forsan ei acido tribuuntur quod oleorum pars est componens: hoc tamen concessio non facile est rationem reddere quapropter oleis pinguibus & mitioribus hæ solutiones sæpius & facilius perficiuntur quam oleis vel essentialibus vel empyreumaticis ubi acidum multo magis evolutum & activum extare videtur. Hoc nihilominus pro certo est, quod si nitorem ferri cuprive superficiiei velimus conservare, oleo igne cocto illinenda sunt, verum si oleum pingue incoctum adhibeatur metalla rubigine tantum celerius inquinantur. — Quæ hujus differentię causa est, an ut in oleis essentialibus & empyreumaticis acidum cum parte aquosa magis immediate jungatur, itaque quamvis liberius tamen viribus inferioribus agat dum in oleo pingui & miti æqualius & per omnem quasi massam distributum, ubi hanc relinquit causa in metallum aliudve corpus agendi, id corpus vi magis concentrata adgreditur? An tota hæc actio oleorum in substantias metallicas tribuenda est ut quidam crediderunt præsentię aeris fixi aliusve gasis in oleo: qui aer olei coctione extricatur. Huic sententię maxime repugnat quod olea, licet ubi coctione suo aere fixo privata sunt, actionem in metalla exercere cessent, omnia tamen & majore etiam vi metalla aggrediuntur, ubi longa custodia rancida facta sunt quo in casu aer fixus non minus quam coctione extricatus est & non minus ex oleis amissus.

E semi-metallis arsenicum omni oleo pingui solubile est; quæ autem cujusve indolis sunt composita exinde facta nemo quem scio examinavit. Cuprum etiam at in parva quantitate in omni oleo pingui dissolvitur, & in

F

rubi-

rubiginem five calcem convertitur, colore pulchro viridi, cujus autem proprietates ignorantur.

Plumbum & stannum itaque in parva quantitate at in statu metallico solubilia oleis sunt, & solvuntur quidem nullo calore adhibito, postquam enim per tempus aliquod in oleo frigido submersa sunt, eorum superficies rubigine cinerea obtegitur. — Quod si tantus calor adsit ut ebulliat oleum, tum submersa hæc metalla non funduntur modo, sed calcinantur & quæ sequitur inde, non proprie metalli sed calcis est solutio. —

Argentum vivum potest agitatione vel trituratione exquisitè cum oleis permisceri, at veram solutionem ab his vix patitur. —

Ex metallorum calcibus vel, si magis placeat, ex metallis phlogisto privatis, pars maxima potest cum oleis, præcipue pinguibus, conjungi: ex omnibus saltem terris metallicis in quibus experimentum feci, nulla est inventa quam non potui, & quidem sola trituratione, ita arcte cum oleo conjungere, ut nullo modo, nisi ignis acidorumve actio accedat, separare amplius liceat: exinde autem est ut hujusmodi materiis plerisque colorantibus utantur pictores. — Sed inter has substantias multæ sunt, quibus tanta est cum oleo affinitas, ut ab eo vere solvantur, & cum eo massam prorsus homogeneam conficiant. — Plumbi calces omnes (licet vel igne vel acidis præparatæ sint) ut minium, cerussa lythargyra possunt adjuvante calore in quavisunque fere quantitate cum oleis pinguibus conjungi. — Calcis si parva sit proportio, fluiditas olei quæsi minuitur, & oleum ad desiccationem pronius redditur, ob quam quidem proprietatem olea ita præparata apud pictores etiam magno & frequenti in usu sunt. — Hæc autem proprietas inde venit quod olei partes fluidiores jamjam a calce ex magna parte absorptæ fuerint. — Si

Si major sit proportio calcis, cum oleo massam firmam & solidam format, quæ tamen calore facile emollitur, & qua in pharmacia pro emplastrorum basi communiter utimur. —

Bismuthi & Stanni calces oleis non minus quam hæ plumbi solubiles sunt, sed composita quæ exinde oriuntur nunquam examinata esse chemicis videntur. Composita omnia ex oleis cum metallorum calcibus natura haud dissimili sunt saponibus, de quibus jam supradictum est, qui ex oleis cum alkali componuntur: in utraque effectus fere similes aqua edit, acidis utraque decomponuntur, & in decompositis oleum ex utrisque eandem speciem eandem qualitates præbet. —

In regno vegetabili multa sunt materiarum genera quæ facile cum oleis conjunguntur magnaue gaudent affinitate. — Imprimis enim quum omnia olea multas proprietates habeant inter sese communes, & unum cum altero satis facile commisceantur, tum in regno vegetabili omnia quæ olea pura inveniuntur, cum omnibus diversi generis oleis conjungi possunt; itaque ex oleis densis ponderosis cum levioribus & rarioribus, ex pinguibus cum essentialibus, ex oleis demum animalibus & mineralibus cum omnibus variis oleis quæ in plantis inveniuntur multa possunt & variæ naturæ composita misturæque formari; hæ veram mixturæ quam facillime faciendæ parum hucusque examinatæ sunt. —

Balsama & resinæ, quum quidem nihil sint aliud nisi olea parte rariore & fluidiore privata, omnia magis minusve solubilia sunt in oleis cujuscunque generis. Quæ autem e gummi cum resina composita gummi-resina appellantur horum pars sola resinosa hoc menstruo solubilis est.

Sales essentialiales dicti, qui e quibusdam resinis, ut Benzoini, obtinentur, & qui ex oleo essentiali tenuissimo cum acido consolidari videntur, non minus quam ipsæ resinæ in oleis solvi possunt; quibus licet camphoram adjicere materiam his valde similem, in qua autem acidi præsentia vix sensibilis est. —

Aliud est & magni momenti in vegetabilibus principium quod cum oleis facillime miscibile est, causa scilicet illa invisibilis odoris, saporis, multarumque aliarum proprietatum, cui chemici nomen spiritus rectoris tribuerunt. — Hoc admirandum principium, vegetabilibus quidem non peculiare, nam in animalibus etiam existit, quod odore diverso distinguit non modo genera & species, sed & individua diversa, ut videmus in canibus aliisque animalibus qui solo odore magistri vel prædæ vestigia sequuntur, hoc principium, apud veteres chemicos Archeus ignisque filius nominatum, & in sulphure habitare dictum, cum oleis maximam affinitatem habet. — Olea autem cum quibus sæpissime conjungitur ea sunt quibus natura volatilis est & ætherea, ut essentialibus est omnibus; quæ enim olea pinguiora sunt & crassiora quamvis cum plantis, ope digestionis, peculiari possunt imbui odore, eum tamen nunquam æque fortem & gravem possidebunt. — Si vero, quod experimento inveni, oleum quodvis distillatione repetita æthereum redditum de novo & sæpius super plantas aromaticas distilletur, harum plantarum principio odorante tantum impregnari potest, ut oleis plerisque essentialibus & tenuitate & odoris vi vix cedat. —

Patet igitur quæ vegetabilium principia, & partes, cum oleis conjungi possunt, & quo scopo, his mensuris in plantas uti liceat: his extrahuntur partes oleosæ, balsama, resinæ, principium odorans, & nonnunquam ut etiam inveni principium colorans. —

Vini

Vini spiritus, qui elicitur ex materiis vegetabilibus fermentatione vinosa subactis, a plerisque ut oleorum menstruum conspectum est, sed multum abest ut hoc universaliter verum sit; nam hic liquor potest cum his solum oleis vere & facile conjungi, quæ tenuioris & magis volatilis sunt, naturæ. — Alia quidem olea possunt etiam cum vini spiritu conjungi, sed non nisi post olei quandam mutationem, vel substantiæ salinæ intermedio. — Revera & de ipsis oleis essentialibus demonstravit clarissimus Macqueir quod ea propter vini spiritu solubilia sint, quia in iis semper adsit acidum evolutum, & valde activum. Olea pingua, cera & similia, in quibus acidum intime & accurate cum aliis partibus commiscitur & confunditur, nihil prorsus ab actione spiritus vini patiuntur, quando autem, coctione & distillatione acidum eorum evolvitur, & liberatur, tunc eadem olea ~~hunc~~ ^{hoc} menstruo magis minusve solubilia redduntur. — Olea essentialia e contra quum, ut supra demonstratum est, distillatione quantitatem acidi deponant, hanc igitur operationem subeundo minus quam antea in spiritu vini solubilia fiunt. — Olei attamen crassi & pinguis quamvis coctio prioresve distillationes ad acidum extricandum & evolvendum inserviant, itaque oleum vini spiritu magis solubile reddunt; quando autem sæpius hujusmodi olea distillantur, ex acido etiam partem deponere incipiunt, & nihil dubito quin distillationibus repetitis redderentur demum, ad instar essentialium, minus minusque vini spiritu solubilia. —

Quamvis in plerisque non tamen in omnibus oleis quæ vini spiritu solubilia sunt eam proprietatem acidi præsentiae licet tribuere: saponæ enim qui cum alkali præparati sunt, & oleum animale quod nihil salinum nisi alkali continet, non minus quam resina aliaque similia ex acido composita hac quoque proprietate gaudent, & verisimile est, ut e salibus neutris sint qui in oleo soluti illud oleum spiritu vini solubile possint reddere. —

Oleorum compositiones sive mixturas cum materiis e regno animali quod spectat, satis jam supra distinximus has duas olei species quæ in his corporibus inveniuntur, una scilicet cui proprietates fere communes sunt cum oleis plantarum pinguibus, igiturque ac generis ejusdem habita: altera vero quæ ex animalis substantiæ decompositione obtinetur, quæ & proprietatibus sibi peculiaribus gaudet. — Cum utraque autem specie olea vegetabilia pariter miscibilia sunt: & licet ad hæc adjiciantur variæ substantiæ salinæ, præcipue alkali volatile quæ animalibus in corporibus inveniuntur, & quæ cum oleis magis minusve miscibilia sunt, nulla pene alia composita ex animali materia cum oleis cognoscuntur. — In hanc rem tamen experimenta possent nonnulla haud infructuosa institui. — Illustrissimus Boerhaave de illo magno calore differens quem olea pingua accipere possunt, observavit, quod ita calefacta insigni facultate gaudeant olea, ut a putrefactione materiam quamque animale in iis submersam conservent, e qua ut docet, omnis ægyptiaca ars corpora condiendi mortuorum plane pendeat. — Hujus modi autem animalis materiæ conservandæ effectum ita explicavit. — Substantia vel corpus quodvis animale ubi in oleo bulliente immergitur, crusta statim in tota superficie circumdatur, quæ duritiæ fere lapidis ad instar est, colore autem tali ac ignis dare solet, primum luteo, in rubrum & deinde in nigerrimum transeunte: materia autem sub hac crusta qua includitur, calore olei circumdantis agitata, & motu quasi suffocato, seu in introrsum reflexo coquitur, & mutatur modo mirabili, durefcit, & ad longam conservationem aptatur. — Sed corpora ita in oleo cocta, quando aquosis implentur humoribus, ut variorum generum cibi piscesque, hi tum humores crusta sub externa compressi, concentrati, tantoque calore penetrati, ad nutritionem & digestionem aptissimi redduntur; & alimenta quidem quæ hoc modo præparata sunt, dum omnia sua principia coctione arc-
tius

ctius inter sese colligantur, causis externis corruptionis parum afficiuntur, & in longum tempus facillime conservantur.

C A P. IV.

De Oleis mineralibus.

Hujus nostræ dissertationis propositum fuit, olea in genere solummodo considerare, de omni enim specie singulatim differere Limites Dissertationis longe excederet. Sed quum olea de quibus hæcenus sermo fuit, unice in regnis vegetabilium & animalium reperiuntur, non a proposito videtur abesse, ut hic loci mentio quædam fiat de iis quæ in regno minerali originem capiunt.

Variis in locis & alte sæpe sub terra reperiuntur hæc substantiæ, speciebus diversis, quæ bitumina appellantur: ut in terra inveniuntur, variâ est illorum spissitudo; & quamvis solida plerisque natura est, nonnulla tamen ex iis sunt, quæ plena fluiditate gaudent: ut naphtha & petroleum, quibus omnes insunt oleorum characteres, imo dicuntur interdum nec tenuitate, nec levitate, nec inflammabilitate, iis oleis cedere, quæ natura potissimum atheærea sunt. — Hujusmodi autem bitumina in nostra orbis terrarum parte parum cognita, raro pura & sine falsificatione comparanda sunt. — Ex aliis & solidioribus bituminibus, ut ambra, asphalto, carbone fossili, liquor potest distillationis ope elici, qui non minus omnibus olei proprietatibus gaudet, & cujus presentix plane debetur omnium eorum bituminum inflammabilitas. — Præter hoc oleum, bitumina præbent ope distillationis phlegmatis seu aquæ quantitatem, acidum quoddam volatile, oleum spissius & nigrius,

nigrius, & residuum demum carbonem: at ex ambra seu succino obtinetur insuper sal quidam concretus huic bitumini peculiaris. — Sed ex hac bituminum decompositione uti patet ea ex oleo cum acido præcipue componi, sic inter ea & plantarum resinas analogia plane conspicua est. — Ab resinis tamen in multis etiam differunt: nam illis plerumque sunt & solidiora & duriora; odor iis est peculiaris, & ab odore aromatico resinarum omnino diversus; spiritu vini bitumina fere insolubilia sunt, saltem sine aliquo intermedio (*), & distillationis ope nonnulla ex iis acidum plane sulphureum edunt. — In omnibus forsan bituminibus acidum mineralis naturæ est; in ambra vero demonstratum est acidum idem esse ac salis communis seu marini. — Bituminum solventia omnia sunt olea vegetabilia, cum quibus calore adjuvante, solidissima & durissima misceri & conjungi queunt; hoc modo vernices ex ambra communiter præparantur.

Olea mineralia sive in natura jam fluida reperiantur, sive e bituminibus solidis distillationis ope eliciantur, inter sese natura & proprietatibus satis diversa sunt. Nonnulla ex iis vaporationi exposita fluiditatem facile amittunt, & formam naturamque solidi bituminis reassumunt, alia autem pertinaciter fluida, vi caloris integre in Vapores abeunt, nihilque præter terræ paucillum relinquunt; quædam aquæ fere ad instar pellucida sunt, alia vario tincta colore, flavo, rubro, nigro &c. — Gravitate specifica & aliis forsan qualitatibus haud minus unum ab altero differt. Vini spiritus, tanquam bitumina solida, olea mineralia videntur insolubilia; adjecta verum parva quantitate salis, sive etiam saponis alkalmi, eo menstruo sine difficultate solvun-

(*) Ambra quodam modo exceptionem facit, quod bituminis hujus licet non ex integro spiritu vini dissolvatur, certa pars hoc menstruo solubilis sit, itaque tinctura ex ea præparata in Officinis prostat.

solvuntur. — Cum oleis vegetabilibus potissimum essentialibus in genere miscibilia sunt: & distillationis ope possunt ut alia olea rectificari, parte tenuiore primum semper distillante.

Nobis nunc temporis, neque otium neque facultas est, ut hoc olei genus latius examinemus, licet de his multa inquirenda supersint, quæ a chemicis nondum explorata sunt. — De omnibus verum hujusmodi materiis nihil majoris momenti videtur quam ut de vera earum origine aliquid certi haberemus; an (licet sub terra in regione minerali inveniantur) origo & formatio huic regioni recte tribuatur. — Contrariam quidem sententiam plerique recentiorum adoptarunt, neque ad eam suffulciendam argumenta defuerunt. — In nulla alia substantia cui mineralis est origo invenitur unquam oleosæ materiæ particula. Acida mineralia præcipue vitriolicum cum oleis vegetabilibus commiscendo composita formantur a natura bituminum haud multo discrepantiâ, & quibus forsân, ut vera bitumina evadant, non nisi tempore longaque digestionem opus esset. — Denique ut dicunt hi scriptores, facile est comprehensu, quo modo olea bituminosa terræ in superficie præparata, postea in regiones subterraneas transire possint, ibique novas subire mutationes. — Quum enim & plantarum & animalium corpora in terræ superficie continuo depereant, ex his magnam quantitatem olei in terram descendere oportet. — Præterea non dubitandum est, quin ipsa terra diversis in locis, sæculisque diversis, magnas subierit mutationes, ut quæ olim superficies fuerat, nunc sæpe alte obruta & sepulta invenitur, & una cum ea omnia corpora organizata quæ in superficie producta fuerant, herbæ, arbores, animalia; at iisdem in locis seu in vicinia bitumina quoque persæpeveniuntur; id quod arguit, eorum originem oleosæ saltem partis, in regno minerali non esse quærendam. — His & aliis argumentis opinio satis speciosa redditur, quod e corporibus

ribus organizatis hæc etiam olea originem trahant, sed pro certo idem affirmare haud licet. — Quis enim adhuc altos recessus mineralis regionis exploravit, & omnia accurate scit quæ ibi conficiuntur, & quæ confici possunt. — Si ~~qui~~ chymicus crediderit se suo in laboratorio oleum verum formasse, & creavisse, quis negare audebit inter omnes illas maximas & incognitas operationes quibus, in immensis terræ officinis, formantur metalla, omnisque generis fossilia, nullam esse, quæ idem efficere valeat, quod ille cum tanta facilitate perfecisse credit. — Verum licet corpora varia organizata & animalium & plantarum in terræ superficie continuo pereant, non tamen inde credibile est, oleum eorum alte in terram descendere; iis enim corporibus putrefactione pereuntibus, ex natura ipsius putrefactionis (ut demonstravit clarissimus Beaumé) oleum eorum corporum ex integro decomponitur & consumitur. — Plantas & Arbores subterraneas quod respicit, bitumina oleaque mineralia sæpe in locis inveniuntur ubi neque hæc neque alia corpora organizata adsunt, & in locis ubi hæc maxime abundant nullum sæpe bitumen repertum est. — Denique ante quam novis observationibus novisque argumentis res magis illustrata fuerit, tota hæc questio multis dubiis erit obnoxia. — Hoc tamen certum est, secundum ea, quæ de regno minerali, nobis cognita sunt, parvam olei quantitatem seu proportionem ibi adesse, quum in reliquis vero naturæ regnis, nullum fere inveniri individuum cujus non pars componens oleum esse videatur.



C A P. V.

*De Oleorum in corporibus plantarum & animalium
origine & usu.*

Quamvis multa nobis persuadent, contra opinionem
quorundam, plantas ~~aliud quid~~ ex Terra præter aquam *aliquid aliud*
puram reforbere, quamvis & ex atmosphæra principia
quædam præter aerem eaque magis composita eas colli-
gere verisimile sit, non licet tamen dubitare, quin omnes
illæ productiones, quæ regno vegetabili peculiare sunt,
formationem suam & proprietates debeant præcipue ipsa-
rum plantarum œconomix, motibus, actioni. — Inter
illas autem productiones recensentur omnia olea quæcun-
que, quarum origo & formatio plantarum ipsarum viribus
prorsus tribuenda sunt. — Frustra enim objiceretur quæ-
dam sola materiis constare oleosis, adeoque illa prorsus
posse plantis ipsis nutrimentum præbere: nam in omni
cujuscunque naturæ solo plantæ crescunt, & oleis sibi
propriis implentur, in aqua pura crescunt, & in ipso aere
suspensæ, nec oleis tamen destituuntur.

Quam frequens autem sit materia oleosa in plantis,
oleum tamen in distincto statu rarius invenitur; nam præ-
ter eas substantias vegetabiles ex quibus vi sola mechanica
solet exprimi, e nulla fere planta nisi decompositione &
separatione chymica obtinetur. — In plantis quidem ple-
risque oleum in statu quodam saponaceo adest, cum sa-
linis materiis & cum terra conjunctum, & his mediantibus
cum liquoribus aquosis etiam commistum. — Et illa sane
olea quæ inveniuntur quibusdam in plantis distincta, sæ-
pius remotis modo secretionibus confecta sunt; in fructu,

in feminibus, frequentius quam in truncis plantarum insunt; videtur autem materiæ cujusdam saponaceæ formatio omni secretioni semper antecedere. — Potest forsitan ipsa vegetatio considerari quasi hujus materiæ e variis elementis formatio, & variis organis & actione distributio & mutatio. — Exinde quidem venit plantæ omnis incrementum, & augmentum, exinde varia natura, qualitates, contenta, & diversarum plantarum, & ejusdem plantæ partium diversarum; dum pro sua peculiari organizatione & œconomia, utrumque colligit, commiscet, distribuit, elaborat principia elementaria proportionem & ad proposita quæ sibi conveniunt. — Plantarum succus omnis, omnis liquor qui per vasa circulator seu distribuitur, ad earum nutrimentum, incrementum, & productiones contribuens, naturæ saponaceæ est, semperque continet aliquid oleosi, cum materia salina, cum terra, cum aqua commistum.

Nonnulli sunt & quidem ingeniosissimi auctores, qui hanc operationem vegetabilis œconomix pro initio & origine omnis cujuscunque in natura mixturæ, & compositionis habent, pro causa omnium quæ principia secundaria appellantur, pro origine demum omnis organizationis in corporibus. — Dum enim credunt a formatione oleosæ seu saponaceæ materiæ in plantis causam sive principium inflammabilitatis sive (ut quidam ex iis docuerunt) ignem ipsum elementarem, sive materiam lucis, primum in mixturam cum aliis elementis cogi, tum vero ex hoc composito eam in alia transire necesse est. — Animalia autem omne suum nutrimentum & incrementum e plantis magis minusve immediate accipiunt, & e corporibus plantarum pariter & animalium multa nova variaque composita in ipsam terram transeunt, & in terra novis iterum mutationibus objiciuntur, indeque forsitan originem capiunt sales, mineralia, metalla, quæ vicissim corpora animalia & vegetabilia modis variis afficere possunt.

Hæc

Hæc contemplatio ingeniosa est, & hoc imprimis fundamento nititur, quod introductio causæ sive principii inflammabilitatis in plantas maximi momenti consequentias per totam fere naturam proferat. — Exinde plane oriuntur omnes hæ productiones, quæ plantis peculiare sunt, & in quibus omnes plantarum vires virtutesque sedem habent: ejusmodi sunt resinæ, omnes sales essentielles, gummata, succique varii in quibus omnibus materia oleosa & inflammabilis non modo præfens adest, sed ea pars esse videtur unde præcipue characteres & qualitates pendent: illa orbatæ hæ omnes materiæ nihil fere præter elementa simplicissima exhibent. — In omni substantia vegetabili cui color est, odor, vel sapor, adest quoque materia oleosa inflammabilis, & locus est suspicandi quod ab ejus præsentia & modificationibus oriuntur non solum hæ qualitates, sed omnes plane proprietates quibus hæ substantiæ in corpus animale agunt, sive ceu alimenta, sive ceu medicamenta aut venena habeantur.

Omnis insuper fermentatio, illud instrumentum quo natura & species corporum mutantur, variantur, & quo denique composita in principia simplicia & elementaria resolvuntur, omnis cujuscunque generis fermentatio, vinosa, acida, putrida, ex præsentia oleosæ materiæ incipit, & huic novas formas, speciem, distributionem impertiendo præcipue exercetur. — In nutrimento omni quod animalia e plantis accipiunt, non minus semper adest materia oleosa, & in chyla animalium ut in succis nutritiis plantarum sub forma saponacea quoque adest: hujus autem liquoris ex accessione continua animalium corpora totum suum augmentum capiunt, totam jacturæ quotidianæ reparationem. — In corporibus animalium oeconomia diversa, facultates, motusque diversi materiæ introductæ novas etiam formas, novas modificationes comparant; at per omnia ea corpora, per omnes eorum partes, principium oleosum inflammabile semper conspicuum est, semper

compositi pars necessaria. — Sed in plerisque his corporibus deponitur postea plus vel minus adipis, qui quidem licet secretus sit, quam minimum differt ab oleis multis vegetabilibus; tam parum ab animali œconomia mutatus ut chymicis plerisque in una eademque classe ponitur cum oleis plantarum mitioribus, cum quibus quidem omnes suas qualitates fere communes habet. — Adeps vero non multum in animali corpore agitatus fuisse videtur: plane & sæpe in humores circulantes iterum absorberitur, & ulteriorem coctionem ulterioresque mutationes pati potest.

Principio oleoso inflammabili, quod continent corpora & animalium & plantarum, variæ mutationes & in aere, & in aquis, ipsaque in terra debentur, novæ qualitates novæ dispositiones his elementis accedunt, unde effectus sequentur tanti, ut nobis eos investigare concessum haud sit. — Non impossibile est ut regnum ipsum fossile ex hoc fonte aliquod phlogisticum, aliquod inflammabile hauriat; non impossibile est quod ipsa metalla sub terra alte reposta suam originem & naturam ex magna parte plantis debeant, quæ vegetant in superficie. — Quod si vero hoc principium inflammabile cum multis ingeniosissimis viris assumamus unum idemque esse cum luce, cum igne, vel cum materia electrica, liceret suspicari ut hoc, plantarum œconomia primum in statum compositionis inductum, possit causa præcipua fieri omnium earum mutationum, varietatum, compositionum quibus alia elementa subjiciuntur.

F I N I S.





THESES.

1.

Causa proxima podagræ non in humorum at solidorum potius constitutione quærenda est.

2.

Regimine interdum, medicinis nunquam, Arthriticus sanatur; & in hoc morbo pleraque laudatissima remedia non absque summo periculo adhibentur.

3.

Cortex Peruvianus, in ipso tantum ventriculo manens, effectus sæpe insignes præbet, nec ad febrium intermittentium curationem necessarium est, ut hoc remedium ulterius in ipsam massam circulantem procedat.

4.

In Gonorrhœa virulenta mercurii parva adhibitio nunquam nocet, sæpe utilis & efficax est & præcautio laudabilis semper videtur.

5.

5.

5. In febribus continuis venæsectio nunquam temere nec inconsulto præscribi debet: nostro tempore frequentiores sunt febres, ubi cum periculo, quam cum certo commodo, adhiberi solet.

6.

6. Amenorrhœa sæpius symptoma morbi est quam ipse morbus, & in talibus casibus remedia, quibus sanatur morbus primarius, ea optima sunt emmenagoga.

